

MARTINI LISTER

è S. R. LOND.

DE FONTIBUS  
MEDICATIS AN-  
GLIÆ,

Exercitatio Nova &  
Prior.

*Tales sunt aquæ, qualis terra, per quam  
fluunt. Plin.*

juxta ex emplar Eboracense.



FRANCOFURTI & LIPSIAE,

Sumptibus JOHANNIS GROSSII,  
Literis CHRISTIANI SCHOLVINI,  
Anno M. DC. LXXXIV.





L. S.

**A**lteram & Priorem qualem-  
cunque de Fontibus Medica-  
tis Angliæ Exercitationem  
habet : De quâ tamen eden-  
dâ multum, diuque apud me  
dubitavi ; adeo multa sunt, quæ me pro-  
hibuerunt. Ipsa quidem res, de quâ  
si scriberem, ita à nostris plerisque  
tractata est, ut iis litem inferre, rixas-  
que movere necessariò viderer : à quâ  
tamen inurbanitate maximè abhorreo :  
At ipse quidem hîc, ut alibi, præter fa-  
cti rationem nihil prorsus affirmo, aut  
cogito. Illa enim perpetua veritas est ;  
alia verò, quæcunque, etiamsi nunc  
nostra ( si placeant ! ) dogmata, mihi  
ipsi fortasse brevî displiceant : Quor-  
sum

sum igitur ea vehementer tuear, si cui importuno minus arrideant? Atque hæc quidem magna disputandi pertinacia, ut opinor, Reipublica literaria pestis & dedecus est. Deinde hæc, olim animi causa, incepta, vix ulla parte conficere per negotia licuit; nec per valetudinem, ut video, mihi unquam licebit: si quæ tamen rectè dicta, aut inventa sint, ea, etiamsi imperfecta, perire nolui. Adhæc, Quod altera & potior Exercitatio à me vix designata est, eamque non, nisi ex assiduo usu & longa locorum experientia, satis intelligi non posse, aliquando existinavi. Attamen vix tanti est, ut aliquis, universam materiam Medicam spernendo, in aliquibus salibus, eorumque cognatis Glebis indagandis, ætatem consumeret, ac si medicus non aliunde humano generi opem ferre potuisset. Porro plurimos ex insignioribus Angliæ fontibus medicatis ipse non adii; sed, vel eorum aquam, nobis advectam, examinavi, vel ex istiusmodi aquarum Peritorum fideli narratione loquor. Idem Philosophi Parisienses

*sienses fecerunt ; iidem tamen omnium optimi hanc rem confecerunt.*


*Illud quidem, si quæ alia, in nostris incæptis, novum est ; scilicet & Ferri & lapidis Calcarii (certè similiter si vacasset) Historiam privatim per singulas eorum differentias diductam. Ad idem exemplum alia quoque Angliæ metalla accuratè distingvi, votum est:*


*Ut autem aliquid P. Guirio, de quibusdam Gallie Fontibus novissimo Scriptori, opponam ; ejus Aluminis sal, de quo vehementer quidem disputat, post diligens examen D. Closei de iisdem aquis coram Philosophis Parisiensibus, minùs me movet. Deinde istiusmodi salium Crystallorum Figuras illum consultiisse oportuit ; quod fieri tamen non potuit ex paucis alicujus salis granis. Item illud apud eundem Autorem, præter omnium Opinionem, temerarium est, non dari Vitriolum viride sive Martis, cum aliud omnino è Pyrite naturaliter non nascatur ; ipsique Pyrite aliud non*  
*A 3 sunt,*

sunt, quàm merui. Ferri metallum. Ad reliqua autem (si quæ à nostris discrepant) ex ipsa Exercitatione, siquidem nullam novam refutationem desiderant, optimè respondetur.

Quos autem alii Ferrugineos, illos ipsos Fontes, nescio quomodo, atramentosos, ut video, appellavi: At illi ab aliis à sapore post Plinium, à me verò ab effectu, quem cum Galla habent, ita nominati sunt.









DE  
FONTIBUS MEDICATIS ANGLIÆ

Exercitatio Nova & Prior.

CAPUT I.

*Salium quatuor fossilium magis cognitorum, sc. Vitrioli, Aluminis, Salis, Petra, dicti, Salis marini, Quintique minus cogniti, sc. Salis Calcarii Figure & Descriptiones.*

**S**Alia Fossilia matura, hactenus apud nos reperta, magisque cognita quatuor sunt; scilicet *Vitriolum* è *Pyrite viride*; *Alumen*; *sal commune*; *Nitrumq;* *Salpetra dictum*.

Ad hæc autem *quintum genus* adjiciendum est, quamvis è minus cognitis est, tamen quòd omnium longè copiosissimum est, meritò in hæc salium classe recensendum est, nimirum *sal, sive Nitrum Calcarium*.

Cùm verò horum omnium salium Figuras, ab eorum crystallis desumtas, diligenter descriperimus, de Medicatorum Fontium salibus aliquid, ut opinor, mox certiùs statuemus: sc. Comparatione, inter salia utriusque generis facta.

*Vitrioli De-  
scriptio.*

1. *Vitriolum autem viride, è Pyrite ferreo na-*  
scitur; cuius maturæ & perfectæ *crystalli* perpe-  
tuò ex utraqve parte mucronatæ, sive acuminatæ  
sunt, & ex decem planis lateribus inæqualibus  
constant: scilicet, ex IV. mediis planis penta-  
gonis, & ad singula quæque extrema acumi-  
nata, terna plana triangula habent; perindè ut  
in Figura prima repræsentatur.

*Aluminis  
Descript.*

2. Lixivium è cremato *aluminio* metallo, diu-  
que servato, percolavimus, siccavimusque. Id  
autem *Crystallus* albas, ad hunc modum Figura-  
tas, dabat; nimirum his Figura paululum com-  
pressa est, ex altera parte, quasi vertice dicas,  
planum sexangulum habet, ex altera & opposita  
parte, sive basi, plano similiter sexangulo insidis  
ejus autem latera claudunt tria sexangula plana,  
quibus alternatim bina plana quadrangula in-  
terponuntur, ita quælibet integra aluminis cry-  
stallus ex XI. planis conficitur: Scilicet, è quin-  
que sexangulis, & senis quadrangulis planis: il-  
la autem ipsa crystallus, quam descripsi, L. Circi-  
tèr grana pendebat. *Vide Fig. 2.*

N. B. Simplex autem & primaria univer-  
forum salium concretio benè & diligenter no-  
tanda est. Nam ubi ea diutius processit, crystalli  
quidem magnitudine augeri videntur: At id  
fere fit plurium salium integrorum & primario-  
rum conjunctione quadam fortuita, unde veræ &  
naturalis Crystallorum figuræ confusio oritur.

3. *Aqua*

3. *Aqua Marina* ad ficcitatem excoqvatur, *Salis communis* rursus ejus sal tantillo aqvæ fontanæ diluatur, crystallos verè cubicas dat. Vid. Fig. 3. *Descrip.*

In medio verò superiore latere, sive plano, velut quædam perspicuitas observatur, puta, à materiæ deficientia, sive inanitate: reliqua autem quinque latera solida & albida sunt.

Ipsas etiam easdem cubicas crystallos nobis exhibuit *salis nostri gemmei* dicti dilutum.

Idem expertus sum de *sale communi*, è fontibus salis mediterraneis nostræ Insulæ excocto.

De *sale* autem marino, è *fabulo* in æstuario *Lancastriensi* confecto, illud porrò notavi, istiusmodi salem in ipsa maceratione, antequam ignem coqvendo expertus fuerat, in massam albisimam *striatam* concrevisse, haud aliter, quàm in Antimonio fuso, aut quodam lapide Gypsi, videre licet: hanc tamen ipsam massam aqua fontana dilui, & ex toto in Crystallos Figuræ cubicæ concrevit, more cæterorum salium marinorum, jam nunc commemoratorum.

4. *Nitrum*, quibusdam *Salpetra* & *Halonitrum* *Nitri* dictum, in crystallos sexangulas, tenues, longas *Descrip.* & æqualiter crassas concrescit. Hæ, inquam, crystalli sua latera paralellogramma habent. Eadem autem definunt ex altera tantum parte, vel quædam acie, vel mucrone, pyramidis in modum acuminato, scilicet ob variurn positum duorum planorum laterum. Vid. Fig. 4.

Notandum autem est, mucronem illum acumin-

minatum, quem ferè ex altera parte uniuscujusque crystallo Nitri ad modum coni figuratum esse diximus, ex ipsa prismi extremitate esse constitutum, & nullatenus ipsum prismi corpus extenuari: quod tamen multos de his Nitri crystallo incautè somniare video.

De simplici autem & primaria harum crystallo concretionem loquor: nam fortuita quadam plurimarum coitione id aliquando evenire videtur.

At illa quidem differentia notanda est, quòd, quæ sic fortuitò coeunt, eadem, si denuò aqua diluantur, in perfectam sui generis speciem tandem ex toto reduci possint.

Præter crystallos verò sexangulares, è *salis petreæ* diluto formatas, ibidem etiam non rarò (si id sal minùs purgatum sit) alias quoque crystallos eubicas multangulares, nescio quasdam, reperies: & hæ omnes, seorsim collectæ ex nova solutione, vel in crystallos Nitri, supra descriptas, abeunt, vel suam originem, si alienæ sunt fatentur.

Sal autem Nitri dictus, in ignem impositus, illicò flammam tenuem concipit, & ex toto non sine strepitu absumitur, omnino nihil capitis mortui, aut Colcotharis, ut Chimici loqui amant, relicto.

5. Est præterea quoddam salis genus, quibusdam *Nitrum Murale*, nobis autem *Calcarium* dictum: quod ferè è lapide Calcario, tam crudo, quam

quàm cocto, in parietibus vetustissimis ædificiorum spontè nascatur. Hujus autem salis minùs cogniti (etiãsi omnium salium fossilium certè apud nos frequentissimi,) Figuram & Descriptionem ipse primus, quòd scio, jam nunc exhibeam.

Itaque hujus salis Calcarii crystalli tenues, longæque sunt; iisque mediis quatuor latera parallelogramma sunt, at fere inæqualia; ex altera verò parte, ipse mucro ex binis planis lateribus triangularibus formatur; ex altera, & adversa parte duo plana quadrata habet, perpetuò ad contrarium cum priore illa parte positum. Ex his verò crystallis majusculæ ad dimidium digitum longæ sunt. Vid. *Fig. 5.*

Hujus autem salis aliæ nonnullæ varietates sunt, quòd aliæ quina latera media habent. &c. quæ singulæ etiam suis figuris in Tabula demonstrantur.

Atque illud quoque sal iterata solutione ex toto concrescit in crystallos, jam descriptas, etiam si singulis vicibus, paucas tantum integras & perfectas obtinneris.

Est etiam de natura hujus salis Calcarii, ut in ignem impositus sine flamma liqueat, & in bullas intumeat, pumicisque albißimi instar indureat: idque planè ad aluminis modum.

CAPUT II.

*De Ferri Venis: ubi non nisi unum in Anglia Pyriten, eumque ex toto ferri merum metallum esse, affirmatur.*

**U**Niversos sales fossiles nostros hactenus descripsimus. cum autem illorum aliquot salium quædam glebæ, tanquam Parentes, rectè existimantur; nimirum vitrioli viridis *Ferri vena*, & salis calcarii *lapis calcarius*, erit instituti nostri, illa metalla breviter explicare. De *Ferrariis* autem *metallis* incipiam.

Itaque Ferri metallorum accidentia & proprietates, quantum eas ipse propria inspectione didici, fidei enarratione communicabo.

Illud imprimis verissimum est, quod à *Plinio* olim positum est; scilicet *Metallorum omnium Vena Ferri largissima est*: certè in Anglia nusquam

\* *de Magne-* non occurrit; at distinctionem illam \* *Gilberti*  
*se. lib. 1. cap.* nostrum non admitto, qui venam ferri metallicam

à ferrea, nescio, quâ materia discernit, atque ita ferè magnam totius Insulæ nostræ Britannicæ partem ferream esse vult: Siquidem illud firmissimum esse duco, omnem, sive terram lutosam, sive venam lapideam, quæ vel cruda, vel cocta, præparatave, quocunque id fiat modo, à magnetē ducatur, ab eoque ut ferrum alliciatur, in ferrum

rum

rum conflare posse. Ut si quis in Fornacibus, vel caloris defectu, vel aliàs, error sit, is non protinus in venam metallicam, ac si non verissimè de natura ferri participaret, rejiciendus est.

Venz autem Ferri metallicæ *experimentum* \* \* *lib. 7.*  
ex Argicola hîc proponere visum est. Nam ad id *P. 12. 124.*  
diligenter examinata sunt singula ferri metalla, infra nominanda.

Venam ferri (inquit ille) experimur in Camino Fabri Ferrarii, eadem uritur, comminuitur, lavatur, siccatur, Magnes in ramentum, lotura collectum, imponitur, qui scobem ferream ad se trahit: ea, pennis deterfa, catino excipitur, atque magnes usque eo in ramentum, loturâ collectum, imponitur, & scobes detergitur, dum restet, quam ad se alliciat. Ea autem simul cum Halonitro coqvitur in catino, donec liqvescat, & ex ea *ferrea massula* confletur. Qvòd si Magnes citò, facilèq; scobem ad se traxerit, Venam Ferri divitem esse conjicimus, si tardè, pauperem: si prorsus eam respuere visus fuerit, ferri paulum, aut nihil in se continere.

§. 1. Præcipua adeo vena ferri *Magnes* est. *Magnes.*  
Is, inquam, optimum ferri metallum est, seqve, aliâq; omnia ferri metalla, vel cruda, vel cocta, ad se allicit, ut proximè suprà positum est.

Is autem, quem ex agro *Devonensi* nostræ Insulæ habui, ex nigro livescit, pauloqve obscurior est, quam ipsum ferrum politum; huic fracto soliditas

luiditas marmorea est: sui ipsius scobem non secus, quam ferri conflati, ad se alliciebat.

*Vena Scintillans, quæ si arenacea.*

§. 2. Secundo autem loco *venam ferri rubram* in medium profero, eaque, velut *arenaceus* quidam lapis, scintillat. huic, inquam, color ex quadam purpura sublividus est: ea inæqualibus, & asperis particulis, quasi dicas ex ferrea scobe, constat: nam quocunque modo illam confringas, ita se semper ostendit; & (ut nihil omitteram, quod de hac re observavi) hic quoque ipsissimus est *venæ ferri Suecicæ* habitus, & nunc, & olim præ cæteris Europæ, meritò æstimatæ: at *Suecicæ* color magis ex livido ad quandam viriditatem accedit: Ita enim universa exemplaria, ex 12. puteis ad me transmissa, ferè ad unum sese habuerunt. Porro hanc nostram, in pulverem redactam, crudam, & ignem nondum expertam, allicit Magnes: at non ita libenter Magnetem sequitur, ut ex *Svecia Venæ*: quæ quidem crudæ & incoctæ Magneti non aliter obtemperant, quam si merum ferrum essent; Optimæ *venæ* certissima nota: at huic nostræ ea quidem proprietas non ex toto deest. Postremo hic noster lapis admodum ponderosus est, ut sunt pleraque metalla, è quibus ferrum conflatur. Ad jugum montium Cretaceorum agri Eboracensis non longè ab oppidulo, *Water* dicto, is lapis repertus est.

§. 3. In iisdem montibus cretaceis, vasto limite circumscriptis, *alia vena ferri rubra* innumeris fere locis se ostendit. Ea autem interdum mol-



mollior est, instar cujusdam argillæ, & quæ durior est, lineas etiam rubras, Chartæ illisæ, ducit. Illam verò, nisi benè ustulatam, non approbat Magnes, in hac quoque vena, mediocriter ferri diviti, insunt quidam velut *Nuclei*, aut *Nodi*, ferrei subrotundi, à seminibus sinapi ad capitis pueri magnitudinem: his autem & durities marmorea, ut nihil dubii sit, illos posse poliri, & in nitorem lævigari. Siquidem etiam fracti lævam & æqualem superficiem ostendunt: Item illis color ex rubrico nigricans est: tractando digitos rubore non inficiunt. At hos etiam crudos, in minutum pulverem contritos, bonus Magnes alliebat.

Item in eadem vena alios molliores lapides, è laminis constantes, invenies, quibus color quidem ruber est.

§. 4. A cretaceis rupibus ad *calcareas plum-* *Hematites.*  
*biferas* agri *Westmorlandiæ* transeo. Hæ quoque ferri Metallorum plurium generum feraces sunt. At iis propria est Vena, quæ *Hematites* appellatur.

Atque hic etiam lapis ibidem sub diversa specie reperitur; unde ab Antiquis & nostris etiam hominibus diversimodè nuncupatur: siquidem interdum stibii fusi more in longas *strias*, ad centrum aliquod spectantes, concrevit, interdum ad extrâ *Uvas* repræsentat, inde *botrytes* quibusdam appellatur.

Interdum *Lavorem* quendam instar Holoferici exprimit, quæ summa lævitas, velut aliquod pingue, digitis sentitur. Quæ tamen omnia accidentia in uno, eodemque lapide notavi: adeo diversâ ratione diversa nomina sortita est eadem vena.

Præterea idem Hæmatites interdum mollis est, & merum lutum, & non aliter, quàm argilla tractari potest. Modò purus putus & ex toto Hæmatites est: modò per minima miscetur cum rupe calcaria plumbifera.

Universæ autem hæ Venæ ferri, chartæ illisæ, admodum liberè ducunt lineam rubram, id quod non sine quodam splendore, quasi metalli alicujus fusi. Et in hoc convenit Hæmatites (ut id obiter notem) cum isto anonymo metallo, à nostris *plumbum nigrum* appellato, non alibi terrarum Europæ, quod scio, Quàm in agro *Westmorlandiæ*, ubi etiam Hæmatites plurimum abundat, invento.

Huic autem ferri venæ sua singularis excellentia est, quod ex ea sine prævia aliquâ in *Regulum* (quod ajunt) fusione optimum ferrum conficitur. Scilicet vel mera ignitio sufficit, ut malleo in ferrum induretur.

Hujus solius metalli fornax hodie in oppidulo, *Millythorp* dicto, agri *Westmorlandiæ*, habetur: At ipse lapis juxta *Furnes Fell* ejusdem agri & alibi effoditur.

At ne hanc quidem venam Ferri, etsi ditissima sit,

fit, Magnes ad se allicit, nisi prius bene ustuletur.

6. Item alium quendam Hæmatitem, à metallariis nostris magnoperè laudatum, ex *Cambria* habeo: huic autem insignis durities est, color ex rubro sublividus, recenter fractus nitorem quendam, instar cuiusdam *Selenitis*, cum rubedine ostendit, item lineam rubram non ducit, neque crudus à Magnete ducitur. Huius quoque lapidis in Ferrum operatio facilis esse dicitur.

7. 5. Seqvuntur Ferri venæ, quæ in arena *Vena Ferri* soluta, *Lapideve arenaceo*, nusquam non inveni- *in arena.* untur. His autem venis ferè color sublividus est: interdum ad rubedinem accedens. Modò lapides fissiles sunt, vel plani; modò concavam testam repræsentant: Interdum solidi & leves lapides sunt: Interdum cum arena permiscentur; qui si duri sunt, *Smiridis* locum supplere quodam modo possint. Interdum eadem venæ arenaceæ merum & molle lutum est.

8. *Ætites* autem in iis, qui concavi sunt, reperi- *Ætites.* tur; Albidam, aut flavam medullam, in se continens. Hi verò lapides naturaliter inæquales sunt, & asperi, iisque ex politurâ gratia quædam additur.

9. Inter arenam verò non rarò *Ocre luteæ* metal- *Ocre Fossiles* lum reperitur, ut ad *Santon Sands* agri Lincolni- *luteo.* ensis, ubi olim magna copia è vena sua effossa est.

Hæ quoque venæ ex pondere se produnt; at nisi benè cumentur, & post magnum ignis tor-

mentum à Magnete non alliciuntur: at ubi id fit, ex toto Magneti cedunt.

Hujusmodi metalli loca sunt ferè, ubicunque arena naturaliter reperitur. Plurima certè nominare possim, at paucis agri Eboracensis contentus sum; nimirum juxta *Kirkham* & *Westo*, ubi plurimi lapides ad similitudinem Ætium habentur, at maximam partem solidi. Item ad *Wentbrige*, ubi eximie purpurascit vena, certè quæ ad meridiem oppiduli, in ipso colli jugo aliquando inveni.

*Ferri metallum in  
vicinia  
carbonum  
Fossilium  
ex meris  
rupium  
stratis, solidis, & dilatatis.*

§. 6. Ferri autem metalla, è quibus in multis Angliæ locis id constatur, longè omnium copiosissima sunt: Quæ verò in vicinia, & inter ipsos *Carbones Fossiles* reperiuntur; venæ dilatate sunt, & ipsa rupium strata, scilicet unum alteri superinjectum. Huic autem lapidi soliditas mar- morea est, & quæ poliri possit: maximèque si *Cochlites* aliquis eo misceatur, à nostris ad polituram valdè expetitur.

Ei ferè color ex livido nigricans, aut sublividus est.

Ex his autem stratis alia solida sunt, & invasissimum spatium dilatantur: Alias ex majusculis *quadratis lapidibus*, velut artificio quodam manufactis, constat, cujusdam Pavimenti instar inter se commissis; iidem autem à nostris *Puteariis Gallystones*, nescio quâ ratione, appellantur.

Ex his verò quadratis lapidibus parvuli in Agello quodam, *Kelsfield* dicto, juxta *Pockley* in vic-

ci-

cinia *Hemsley* agri Eboracensis copiosè reperiuntur: utcunqve quidem optimum Ferri metallum est.

Item alix *Subrotunde pile* sunt, à nostris hominibus *Hareballs* appellatæ, omnium magnitudinum sunt, à nuce vulgari ad lapidem molarem.

His autem venis multa loca in agro Eboracensi nobilitata sunt: Ut *Bentley* in Vicinia *Black Barnsley*, & *Adderston*. &c.

Hæ verò venæ, in minutias contractæ, ante fusionem ferè ustulantur: & in ipsa fusione cum *Saxo calcis* miscentur, deinde vena, in liquorem purgatum fusa, sub malleo multo & improbo in Ferrum induratur.

Item hæ venæ, si iterata fusione purgentur, longè tenacius & præstantissimum *Ferrum* dant: ut experiuntur *Officina Ferraria* juxta *Kerstall Abbie* agri Eboracensis.

In ipsa fusione materia quædam viridis, verè vitrea & non ampliùs in aere resolubilis ipsi metallo innatat.

At universas has venas, nisi probè & diu ustulentur, prorsus ignorat *Magnes*.

§. 7. Ferri autem metalla, in *Suffisia* effossa, è quibus *Bombardæ* regiæ conflantur, hæc sunt.

1. Id quod à nostris *Ballmine*, (id est) metallum *Pilæ* forme, appellatur: sub argilla quâdam albida sternitur. Hic verò lapis velut nucleus albidus est, cortice rubro contextus. Ut hæ, etsi optimum Ferri metallum sint, tamen rariores

*Ferri metalla, Margâ inventa.*

sunt. Diu autem ignitæ ex toto rubræ fiunt, & tum demum à Magnete alliciuntur.

2. Metallum rubrum, albis venis distinctum, huic superiori ad tres pedes subjacet.

3. Tertium quoque rubidum, ad eandem distantiam alteri substratum. *Pette mine* à nostris appellatum; fortè quòd huic & pauciores & fusciore Venulæ albidæ sunt: huic etiam laminæ rubidæ.

4. Quartum & imum metallum: hæc tria autem ultima, pavimenti instar, sternuntur: duo quidem priora molliora sunt; totidem posteriora duriora sunt; & ut facilius fundantur, ita magis ad *Ferrum* contribuunt: Item quarto metallo laminæ rubræ sunt. *Ocræ* etiam hic & illic interstrictum, perinde ut in quibusdam venis Ferri arenaceis. Huc accedit, duo posteriora calida credi, & cæteris faciliorem fusionem præstare, scilicet ob sulphureum Vitrioli principium.

Si quando verò hæc metalla in marga subcærulea reperiuntur, vix tractabilia sunt: Id verò vitium à nimio Vitriolo ortum esse, credibile est. at in alba marga optima sunt.

*Ocræ rufescens, à pyrite orta.*

§. 8. *Ocræ rufescens*, à pyrite ferè nata, & in plerisque acidulis certè atramentosis inventa, merum Ferri metallum est: Et à Magnete post debitam fusionem ex toto allicitur.

*Pyrites.*

§. 9. *Unus Angliæ pyrites*, idque purum purum Ferri metallum est; atque adeò minimè st-

rilis

rilis censendus est, cum Ferri vena est. A reliquis autem Ferri venis distinguitur, quod is per excellentiam vitriolicus est, & argenteo, vel aureo quodam nitore ferè resplendat: item à Calybe percussus, scintillas edit, si durus sit. Illum verò lapidem à Mauritanis *Marchasitam* appellant Moderni. Is autem in omnium metallorum fodinis & multa quidem varietate reperitur. Etenim est, qui aureus, qui argenteus colore tenus: qui lævis, qui striatus, qui mollis, qui durus: qui purus putus & sui generis metallum est, qui variâ proportionē, nunc per minima, nunc parcius miscetur, cum plumbi, cum Stanni, cum æris, cum Aluminis metallo. Item similiter cum ipso silice nigro, cum carbone fossili, cum lapide calcario, cretaceo, aliisque plurimis metallis. Alii cubis constant, alii è laminis, velut membranceis, conficiuntur: alii tuberibus racemosi, alii rotundi, grandinis instar, aut pilæ, cujuslibet Magnitudinis; alii multangulosi, alii faviginosi; imò infinitum esset, singulas differentias exequi; At de eorum aliquibus pauca addam, quæ diligenti perscrutatione ipse observavi.

I. Pyritæ quidem intus striati, ferè subrotundi, extrà tuberosi, & interdum angulosi, reperiuntur. Horum autem Stiria intus tendunt, quasi ad centrum aliquod instar Antimonii fusi, aut perinde ut supra posuimus de quodam Hamatite.

In his verò sunt, qui locis humidis copiosè vitriolum

triolum suum edunt. Hi, ubicunq; saxum creta-  
ceum, ibi & ipsi reperiuntur, at ferè venâ sparsâ.  
A nostris *Rust balls* appellantur, certè in Lapi-  
dinis juxta *Foulmore* agri *Cantabrigiensis*. Item in  
collibus agri *Eboracensis* *The Wools* dictis pas-  
sim. De his autem, nescio, quæ mirabilia, suo  
more *Glauberus* narrat.

2. Alii *Pyritæ aurei* ibidem, & præcipuè in ru-  
pibus plumbiferis, & inter carbones *Fossiles*  
sunt, qui cubis constant, alioque modo angulosi  
sunt. Hi autem quibusdam *Helmontii Ludus*  
existimantur.

3. Interdum etiam, præcipuè ubi carbones  
fossiles abundant, & alibi, ingentia *saxorum strata*  
è solo *Pyritæ* & ex toto constant, alia eorum te-  
nuia quidem, at alia crassa, & sesquipedalia &  
amplius, ut inter alia loca, juxta *Bently Hall*, valle  
dictâ *Latherden*, agri *Cravenensis*, observavi.

In his autem *Pyritarum* stratis alii lapides  
molles sunt, & fragiles, alii durissimi & plane  
silicei, ut perforari admodum difficulter possint;  
magno metallariorum incommodo: Ut puteis  
carbonum fossilium juxta *Coln.* agri *Lancastrien-*  
*sis*.

4. Item alii *Pyritæ* sunt *Testarum* quarundam  
formâ, in rupibus *Derbiansibus* reperti, ubi vulgò  
*Cheristone* audiunt.

5. Qui verò *Pyritæ* in *Stannifodinis* habentur, à  
nostris Metallariis *Mundic* & *Maxy* appellantur.  
At non aliud sunt, quàm vulgares *Pyritæ*, scilicet

Ferri



Ferri metallum aureo vel argenteo splendore conspicuum.

6. Item alios *Pyritas*, prorsus *Argenteo splendore* eleganter illustratos, habui è puteis Carbonum fossilium non longè a *Wakefield*.

7. Item in medio silice nigro *pyriten* aureum commistum habeo: Is autem lapis rarissimè in montibus cretaceis nostris inventus est.

8. Item cum *Plumbi metallo* *Pyriten* variis modis commistum habeo: interdum id totum *pyrite*, velut cortice quodam, contegitur: Interdum per minima inter se miscentur, ita tamen, ut aliquando vel nudis oculis *Pyrites*, velut nodus quidam, alteri metallo inseritur. Interdum istam misturam non, nisi *Magnetis* auxilio, idque post debitam unctionem, cognoscere licet.

9. Idem cogita de *Aëris metallo*, sed ob utriusque quandam similitudinem id vix oculis dignoscitur: adhibito autem *Magnete* cremato lapidi, faciliè exploratur.

10. In Anglia verò *Argentum* purum metallum nondum, quod scio, repertum est; sed ex omni *plumbi metallo*, nullo excepto, certè de triginta minimum puteis, expertus loquor, *argentum* elici potest.

Ipsum autem *Plumbi metallum* *Ferri* venis per minima, ut supra notavimus, misceri, plurimis experimentis mihi satis constat.

11. Item *Saxa aluminosa* juxta *Whitby* & alibi agri *Eboracensis Pyrite* abundant; unde parum

ignita per se postea accenduntur. Idem quoque Sulphuris copia, in summis saxorum crematorum cumulis inventa, satis superque testatur. Imò vix ullum Aluminis metallum Pyrite vacuum apud nos reperitur. Adeoque vel nudis oculis ex aureo splendore ferè ubique cognoscitur.

12. Omitto *Pyritas ligneos ex Hibernia* (imò quod olim lignum Fraxinum, jam Magnes est, duritie marmoreâ) etiam copiosè reperiundos ad *Harrigate* agri Eboracensis. Item *Conchites* plurium generum, aliaque multa fossilia, *Pyritæ* infecta. Atque hæc hæcenus de Pyritis ex nostra observatione.

Hæc autem Universa & singula, quatenus *Pyritæ* sunt, post debitam unctionem esse unius Ferri venam, *Magnes* mihi liquidò demonstravit.

### CAPUT III.

#### *De Lapide Calcario.*

**S**uperiore Capite variam Ferri venam enarravimus; jam *Lapis* quoque *calcarius* paucis explicandus est.

Hujus autem lapidis ratione & proportionem exiguum est in Anglia Ferri metallum. Nam ex eo esse montium, terrenæque glebæ longè maximam partem existimo.

At hujus lapidis *Calcarii* plurimæ apud me differentiæ sunt: quas tamen pluribus enarrare non vacat: Univerforum verò illa communis

nota

nota est, in calcem uri posse. Item habitus & facies interna lapidis calcarii ferè *levis* est, & ad polituram spectans.

In hoc autem censu enumerantur *Creta* quoq; *alba*, ejusq; *alba* argilla: item ipsi *Silices*; ferè in montibus cretaceis naturaliter inventi; ipsi enim igniti, ex aqua demissi, *Dissiliunt*: Item *Selenites*; ipsumq; *Gypsum*, ejusq; differentiarum plurimarum. Item *Stalactites*, aut quivis lapis, ex aqua confectus, communis notæ ratione habita, &c.

#### CAPUT IV.

Fontium quorundam medicatorum Angliæ brevis Enarratio: ubi salium crystalli universæ ad Saltantum commune, & nitrum calcarium referuntur; Terrena verò gleba ad Ocrum & lapidem calcarium.

**F**ontes medicati Angliæ penè infiniti sunt, & nusquam non reperiuntur: at paucos è multis describendos suscepi; an fortè reliqui ad horum exempla intelligantur. Cum autem in iis, de quibus ipsi experimentum fecimus, duo tantum salium genera inventa sunt: Nitrum scilicet Calcarium & Sal commune; de his prius incipiam, qui ex duobus illis salibus alterum tantum continere visi sunt.

i. Itaque

*Fontes falsi,  
færidi.*

I. Itaque *Fons falsus* ad *Harrigate*, sulphureus & fætidus vulgò dictus, in vicinia *Knazborough* agri *Eboracensis* aliud metallum præter merum sale vulgare non continet: cujus rei ea ratio esse potest, quòd istiusmodi sal fere sine ulla, aut admodum exigua gleba oritur; adeoque per se aquis misceri potest: *In singulis* autem *Oultonis* *libris aque ad salis uncias duas* habet; atque adeò vulgari aquæ multum præponderat.

Hujusmodi verò *falsi Fontes* in partibus *Angliæ* Borealibus montosis frequentissimi sunt, atque Universi ferè tanquam ex Sulphure putescunt: Imò tempestate maximè humidâ & frigidâ istorum Fontium odor fætidus eminè ad notabilem distantiam sentitur; cujus rei rationem infra exponam.

*Fontes Lapidescentes.*

2. *Fontis lapidescentis* celeberrimi juxta oppidum *Knazborough* ejusdem agri *Crystalli* omnino eadem sunt, ac quas supra posuimus in sale calcario.

Hujus autem Fontis aqua vi ignis siccetur, & tenues *Lamine calcarie* albidæ copiosè innant. Atque *idem* etiam *aliter* fortè mihi innotuit, scilicet hujus Fontis aquæ aliquot lagenas vitreas ab *Augusto Mense* ad brumam usque apud me servavi. Nihil autem in iis mutatum vidi, antequam vitrea vasa vehementiori gelu rupta fuerant; tum verò *Pulverem lapideum albisimum*, haud parva copia dejectum, animadverti; is sanè pulvis niveus, & supra fidem elegans est,

&

& omni sale destitutus. Adeò quod *laminae* sunt, si coctione aquam exiccaveris; idem pulvis est, si per se dejiciatur.

Ex aqua autem hujus Fontis ad libras 60. habui farinae lapidis calcarii circiter duas uncias & dimidium, salis verò circiter drachmam; scilicet se habent, ut 1. ad 20.

Item denuò experimentum feci, nimirum ex aqua circiter libris 120. Lapidis calcarii ad uncias quinque habui, salis autem ad drachmas duas duntaxat.

Utrumque autem media æstate expertus sum. *Illam* verò aquam ex ipso Fonte hausi, *hanc*, à rupe cadentem, cepimus; adeo nullam differentiam in utraque notare potuimus, & exiguam salis portiunculam præ calce. Quod tamen aliter esse, *Quidam* è nostris Scriptoribus vehementer affirmat, scilicet, ut fidem adstruat *Corrosioni Helmontiana*; at falsus est.

At rectè quidem *Frencius noster* ex hac aqua, igne siccata, tantum pulveris cujusdam lapidei meminit, nec ullius salis mentionem facit; adeo in modica aqua quantitate ipsi nullus esse videbatur.

Ex lacte cocta, id coagulat, scilicet vel exigui salis nitri calcarii ratione. Etiam aqua Vulgari præponderat.

§. Est quidam Fons ejusdem naturæ, nec ita incognitus, ad ipsam ripam fluminis *Onse* juxta *Clifton*, uno lapide ab *Eboraco*: ejus autem aqua cum

cum gallis atramentosa non fit. Is vero salem calcarium dat, item pulverem calcarium album.

§. Idem in aqua putcali domus meæ, dum medio vico, *Stonegate* dicto, habitabam, expertus sum. Nimirum coctione huic tenues laminas lapidis calcarii supernatasse, crystallosque easdem dedisse ultimâ evaporatione.

§. At *N. B.* qui intra hanc urbem *Putei* verum & *Inflammabile halonitrum* unâ cum reliquis dant. At id tantum per accidens, & minimè naturaliter aquæ inest; cum halonitrum ab animalium fordibus oriatur.

§. Fonti medicato *Scarborgensi*, atramentoso & frigido, omnino nihil inest præter unum, at multum salem calcarium.

Hujus autem Fontis aqua & *Ocrum* & lapidem calcarium albidum dat.

In fontis *Scarborgensis* aquæ libris senis (inquit *Witrius noster*) ad tres drachmas contentorum habebis: & nostro quidem experimento in sexdecim libris coctis ad sesquiunciam contentorum habui.

§. Aqua atramentosa in *Vicinia Knazebrough* ad *Harrigate*, quem Fontem dulcem nostri vulgò appellant, eundem salem Calcarium, at ejus pauca tantum grana, in plurimis libris dat. In 80. Libris aquæ 90. grana contentorum remanserunt. Spiritu metallico (inquit *Frencius*) potentior est in hiberno gelu; item æstate manè, quàm meridie.

§. In

Fontes  
atramen-  
tosi frigidi:  
quibus non  
nisi alre-  
rum è sali-  
bus, scilicet  
calcarium.

§. In fonte atramentoso juxta *Maulton*, ejusdem agri, idem sal calcarium habetur; at eadem aqua etiam *Ocræ* & lapidem calcarium copiosè dat: Etiam si quidam è nostris Scriptoribus contrarium audacter affirmant; at falsi sunt. Adde his *Alumen quoddam plumosum*. Scilicet eandem materiam; quam è Sulphure usto, & ipso Pyrite macerato, elicere liceat.

In hunc autem modum, nostro experimento, de hujus Fontis aqua res se habuit. Nimirum ex aqua tepesfacta *Ocræ* omnium prima cadit: mox ab eadem *Squamæ* lapidis calcarii dejiciuntur. Ipsa autem aqua, ad minimam quantitatem tandem siccata, *pilos* quosdam, instar aluminis plumosi, filtro separare licet; scilicet genuinus Pyritæ factus. Ultimò verò è Nitro calcario *CrySTALLI* coeunt.

Si te confusa & exiguarum *CrySTALLORUM* coitio morabitur, Aluminis tantillo vasculum frica, inde tibi elegantes & majusculæ *CrySTALLI* fient.

Ad has verò *Figuras* (quas supra in *Tabula* posuimus ad N. 5.) hujus Fontis *CrySTALLI*, si sigillatim numerentur, prout ipse, magna diligentia adhibita, didici, referri possint.

Nimirum pleraque quatuor plana latera, longa & quadrangula habent, ex altera verò parte in mucronem desinunt, quem bina plana quadrangula constituunt, ex altera in aciem quandam, quam bina quoque plana quadrangula, sed

sed ad contrarium, semper cum prioribus positum, conficiunt; Fortè in his quintum datur planum intermedium, etsi angustissimum, visum, certè non armatum, fere effugiens.

Alia salia sunt, quibus illud *quintum latus* intermedium longe omnium latissimum est: Unde extremarum quoque partium tanta diversitas oritur, ut aliquot eorum *Crystalli* aliæ esse videntur, quam sunt.

*Fontes  
atramentosa-  
si, in quibus  
ambo salia  
sunt.*

Jam ad eos Fontes venio, in quibus *ambo Salia* reperiuntur; at ea fere *Therma* sunt.

4. Paucae autem *Therma*, sive *Fontes calidi*, in *Anglia*, eaque atramentosa sunt: Ex iis autem longè celeberrimæ sunt, quæ in Urbe *Bath* agri *Sommersetensis* oriuntur. De his autem aquis ita nostri scriptores *Jordanus* & *Guidonius* perhibent.

*Thermarum Bathoniensium Salia* sunt *Nitrum* & *sal commune*. (id autem *Nitrum*, cum inflammabile non sit, calcarium esse, nihil dubito.) At inest plus duplo salis communis, quam *Nitri*. Item *Ocre* & *lapis calcarius* insunt. Illius autem ne minimum quidem coctione haberi potest, at hujus ad duplum & amplius omnium *Salium*.

Quod verò lapidem *Calcarium* duorum esse generum vult *Guidonius*, nimis fortè subtiliter distinguit.

Idem tamen in reliquis, quæ sequuntur, audiendus est.

Univerfa circa *Thermas*, maximè lapides, prope



pe ipsos Fontes, ex *Ocre* summâ flavedine inficiuntur, Huius verò ipsius *Ocre* ad Libram integram is ipse *Collegit*. Et addit, quòd in ipso halitu copiosius observatur, ideo illam, bonam partem, exhalari coctione, credibile est.

Thermarum aquæ, dum *Calent*, atramentosæ sunt. Item hæ aquæ vehementer calent, & assidue *vaporant*. Item æqualiter calefcunt tam *Hyeme*, quàm *Æstate*. Item hi Fontes calidi è luto nigro profundè erumpunt.

Thermæ saturatiorem colorem tempore *Gelu*, quàm *calo aperto*, cum gallis dant. Item tempore gelu diu servatæ, tingendi facultatem retinent; quòd aperto cœlo citò amittunt. Si eadem aquæ benè clausis vasculis servantur, post *Plures dies* cum gallis tingunt.

Horum Fontium vel ipsa *Arena* ignita, Sulphuris modo, in tenebris flammam emittit; idem de eorum limo puta: Idem etiam de aquarum residuo, a coctione crematò, expertum est.

## CAP. V.

*De Origine rerum, in Fontibus Medicatis Angliæ contentarum.*

**H**Atenus singulorum Fontium Medicatorum Salia (quæ duo tantum sunt, scilicet Nitrum Calcarium & Sal vulgare) exposuimus; Item eorum glebam terrenam; scilicet,

tam Ocram, quàm lapidem Calcarium. De horum autem omnium *Origine*, sive nascendi modo, mox breviter agemus.

A *Sale* autem marino, sive *vulgari*, incipiam, utpote cujus *nativitas simplicissima* est, neque alia quidem esse videtur, quàm *mera liquatio*; cum illud ipsum Sal purum putum metallum est.

Atque adeo in Fontibus nostris sine ullo, aut admodum exiguo terreno residuo, ut plurimum reperitur.

At ubi *Nitrum Calcarium*, ibi perpetuò *Lapis Calcarius* adest. Nitrumque adeo Calcarium è suo lapide *Germinare*, credibile est. Hujus autem *Germinationis ratio* explicanda est.

*Salium Fossilium* in *Crystallorum Concretionem* supra exposuimus; at alia est eorundem *Germinatio*; Si quidem *illa* in instanti fit; *hec* verò lentè & paulatim procedit, *Plantarum Germinantium more* quodam anologo.

Cùm autem uno, eodemque modo Nitrum calcarium nascatur, atque Vitriolum; quamvis ipsum hoc certè maturum & perfectum in nostris Fontibus medicatis nusquam reperiatur; tamen quòd *Ocra* istius Salis *factura* quædam sit, (de qua etiam in hoc Capite quærendum est.) simul utriusque originem explicare, non alienum erit.

Rem itaque totam *Vitrioli nativitas* illustrat. Ejus autem à *Pyrite* prima eruptio, Si in aëre fit, admodum *Immatura* est; procedente verò tempore, paulò perfectius est: At è nullo lapide Ferreo

reo *Consummatum Vitriolum* gignitur, nisi post debitam *maturitatem*, ad quam, continenter quidem germinando, tandem pervenit.

Vitriolum, inquam, *Neophyton*, *trichites* quidem est, id est, pilorum instar, è Pyrite nascitur: at his pilis nascentibus color quidem *Albidus*, adultis verò *viridis* est. Deinde iidem Pili, à *tenuibus*, tenerisque, *crassi*, validique fiunt. Ipsam autem rem ad hunc modum & experiri, adeoque concipere facile est.

Aquæ Fontanæ *Scilicidium* in pyriten ferreum *glebosum* artificiosè cadat: si cautè & diligenter experimentum conficiatur, & semper citra quam aqua cum gallis atramentosa fiat; (quod subinde explorandum est) salem albidum, in crystallos *cubicæ rhomboides* concrecentem, dabit. *Vide Fig. 6.*

Hæ autem crystallos primâ concretionem oriuntur: nam iis demptis, si ulteriùs eadem siccet, sal alterius generis, si quod habeat, dabit. Scilicet proprii fontis peculiare; quod diligenter animadvertendum est.

Si verò eatenus sinas eandem aquam in Pyriten destillare, donec atramentosa cum gallis fiat, tibi salem immaturum, in crystallos multorum laterum concrecentem proximè ad Aluminis modum, & subviridem exhibebit.

At sinas, velim, eadem *Stiria* quoad colorem & consistentiam perficiantur, (at quot horæ, diesve, ad istam maturitatem requirantur, nondum

exploravi) & Vitrioli maturi, supra descripti, Crystалlos tandem obtinebis.

Hæc autem de *aspergine* Pyritæ in aëre: si tamen perpetuò *sub aqua* servetur, mihi nondum constat, eum salis ullius secundum esse; certe omnino nihil Vitrioli generabitur. Ab eo interim spiritus quidam, siue vapor subtilis, & sulphureus & inflammabilis fertur, & in suam Ocræ, siue ferreum metallum, assidue resolvitur: Nimirum illa sunt quasi vegetandi, siue generandi Vitrioli abortio, siue frustranei sub aquis conatus. At de his infra plura.

In secundo autem jam posito processu nascitur quidem Ocræ; at eam ipsam quoque in pyritis resolutione sub aqua præcipue gigni intelligendum est.

His adde, ante ipsam Vitrioli Vegetationem ne Tormento quidem chymico id elici potest. & a prima statim concrematione Pyritæ (inquit Borrichius) ejus coctioni insisterem, parum collectum fuit, modo verbis eorum, qui hunc magisterio præerant, fides debeat; scilicet ejus germinatio, quæ lente procedit, expectanda est.

Idem quoque identidem confirmatur, cum è lapide calcario, statim ab ipsa coctione macerato, omnino nihil salis concrevit; idem tamen lapis, siue crudus, siue coctus in Parietibus & disalicujus, aut tectoriis usurpatus, abundè Salem suum edit, & qui in crystалlos sui generis, ut supra descriptum est, concrevit.

Idem

Idem quoque ipsum de *Nitri calcarii* germinatione cogitandum est; quod pulverem niveum, sive lapidem calcarium ex utraque, supra posita, ratione similiter dat; atque Vitriolum Ocrum.

At (ne quid ab aliis notatum omittam) Vitriolum perfectum, ab Ocre sua purgatum, albidum fit; ejusque Salis albi calx, sive Caput mortuum, à calcinato Sale non rubescit, Sed fit albidum, leve & spongiosum; ut clarissimus *Coxius* noster Author est.

*Vide Phil. Transact. Oldenburgii Num.*

120.

At respondeo, Creta \* sive lapis Calcarius, \* *Vide ibidem. Num.*

142.

nimirum illis locis, ubi sub die conficitur Vitriolum: Igitur meritò querendum est, an non id Salis alicujus calcarii potius, quàm pyritæ caput mortuum sit. Deinde pyrites aliis quibuslibet lapidibus per minima misceri solet, quarum misurarum plurima genera apud me diligenter servo. Rursus pyrites purus putus Ferri Metallum est, ut supra posui, & crematus totus, quantus est, & instar Ocre calcinatæ rufescit, & à Magnete allicitur; atque adeo per se lapidem Calcarium non dat. Porro istius salis albidum Figuræ examinandæ sunt, an non referri possint ad Vitriolum immaturum, aut ad verum alumen, aut ad sal vulgare, &c.

## CAP. VI.

*Vitrioli generatio, ut ab Helmontio explicata est, refutatur; item illa altera Philosophorum Parisiensem; item Vitriolum factitium, ullâ arte confectum.*

**V**itrioli autem generatio, ut ab Helmontio explicata est, mihi quidem non arridet. Is verò vult, ipsis aquis naturaliter duci Salem, sive succum, sive Spiritum quendam universalem, Embryonatum, esurinum, *Hermophroditicum* (nam his & aliis nominibus ipsum idem appellat.)

*Semen Salis esurini à Saporum Explicatione adhuc liberum Parad. 3.*

--- *Ens primum esurinorum. Ibidem.* --- *Constat Martis Vitriolum Sale esurino, Embryonato Sulphure & vena Ferri (non Ferro) quam Sal esurinum, adhuc volatile, lambendo corrogit. Parad. 4. 4.* --- *Iste Sal non crescit intra venam Ferri. Parad. 4.*

Iste autem sal ipso transitu metallum corrodere potens est; à qua corrosione ipso instanti Vitriolum confici vult.

*Hæc autem contra objicio.*

1. Ipsum ejus salem esurinum, (utpote nullius adhuc qualitatis participem, atque adeo non cognoscibilem) uspiam existere, esse gratis dictum

2. Pyri-

2. Pyriten Vitriolum suum sub aqvis perficere minimè posse, ex rationibus, suprà positis, manifestum est.

3. Ferri venam ab illo sale suo esurino corrodi vix credibile est, siquidem vel mollissimum nostrum *Hematiten*, luti cujusvis æmulum, aut ipsam Ocrum, vel valentissimis menstruis dictis (puta ab Aqua forti dicta, aut *spiritu Nitri*) minimè corrodi posse experti sumus. Illud fortè hominem decepit, scilicet ipsum Ferrum ab acidis quibusdam facile corrodi: At de nullo Ferri Metallo, mihi adhuc in Anglia viso, (& eorum plurima à plerisque Angliæ partibus apud me servo) id minimè verum est; imò nec optimum *Succicum*, magnetis, si quod aliud, amicissimum, à dictis *Menstruis*, non, quatenus ferri metallum est, corroditur; de quâ re expertus fidem facio.

4. Vitriolum assiduâ & lentâ germinatione perfici, experimenta, suprà posita, appello, ergò non ullâ corrosione momento nasci.

Illud quidem verissimum est, è Chalybe cum aqua simplici (imò stillatitia & omni acido vacua, quod testatur elegantissimus Batavus \* *Pecklinus*.) verum & maturum Vitriolum paucis momentis elicere licere.

\* *Purg.  
Exer.*

At tu, velim, cogites, Ferri corpus, densum licet, & ponderosum, tamen vel ipso metallo suo magis porosum esse. Illud arguit ejus fusio, à qua Pumicis instar se habet, admodumque fragile est, nisi postea vehementi opera ictibus duretur.

\* Vid. Agr.  
de re Metall.

Deinde ipse *Chalybs* reliquorum *Electrorum* (cum  
Chimicis loquor) modo fit. \* Id est, Ferrum,  
ictibus duratum, & confectum, fuso metallo rur-  
sus incoquitur, & ad saturitatem usq; eo imbui-  
tur; scilicet longâ coctione plurimum metalli  
fusi in se imbibit. Jam verò Vitriolum non alio  
modo in illo, quàm in pyrite, gigni cogitandum  
est; etiamsi ejus generatio intra ipsum Ferrum  
occultè perficiatur.

Atque adeo è Chalybe id tantum, quod in se  
habet, aqua simplex elicere videtur, & minime  
aliquid Vitrioli in instanti ortum esse. Cui qui-  
dem rei fidem facit, Scobem ferream ab aqua  
infusa incalescere non aliter, quàm calcem vi-  
vam, scilicet à sale ante nato, & quodammodò  
incarcerato. His adde, è Pyrite quidem crudò  
Vitriolum *Trichites* nascitur, at ex eodem ustu-  
lato Vitriolum quidem nascitur, at alio modo,  
haud ita conspicuo, cum ab igne vegetatio futura,  
si non ex parte destrui, certè aliquo modo muta-  
ri videtur. Idem de Ferro existimamus. Rursus  
notum est, aluminis metallum (idem quoque de  
pyrite, nihil dubito, verum est) nimium \* conco-  
qui posse. Postremò, etiamsi Vitriolum non per-  
ficiatur, nisi aliquo tempore germinet, ut suprà  
demonstravimus, tamen quot horz, diesve ad  
ejus maturitatem requirantur, vix adhuc intelli-  
go, ut in hoc, vel in illo experimento, non satis  
temporis fuisse negem, quin Vitriolum perfe-  
ctum gignatur.

Philos.  
Trans. N.  
Ultimo.



5. Ocre est ipsum Ferri metallum, adeoque in se continere certè Vitrioli principia; quod sic demonstratur; Ocre ut ut benè & diligenter lavetur, donec non amplius aquas atramentosas cum gallis efficiet, paulisper tamen, si illam humido aliquo loco recondas, Vitriolum denuò ex ea germinabit, non aliter, quàm è majusculo pyrite.

6. Liqvores Chimici Metalla, quæ eroderint, sponte non deponunt: at universæ acidulæ atramentosæ suam Ocrem subitò dejiciunt.

Deinde iidem liqvores Chimici, si quæ deposuerint, eadem iterum, admoto calore, corrodere possunt: Contrarium verò in acidulis istiusmodi experimur; scilicet eas nunquam suam Ocrem, semel depositam, vel calore admoto, iterum assumere.

§. Item in illo à *Philosophis Parisiensibus*, (ubi de aquis *Gallie* medicatis tractant) dissentio; nimirum esse aliquem vaporem acidum, per se subsistentem, vel alicui sulphuri metallico præexistentem, tanquam ejus ens primarium.

Sed ubicunque istiusmodi vapor, sive spiritus acidus est, si à Pyrite oriatur, verè Vitriolicus est; si ab aluminis metallo, Aluminosus; si à lapide calcario, sui generis Nitrosus est. Imò fateor illorum omnium Salium nascentium, sive vegetantium Spiritus subtilis est; adeoque cujuscunque illorum naturæ, & proprietatum, unde emanavit, verè participat.

Philos.  
Tractat.  
N. 104.

§. Aliqui autem sunt, qui Vitriolum ex ipso *sale communi* fieri posse affirmant. Illud quidem ex parte verum esse potest; Scilicet quatenus iste Sal Vitrioli participavit: Fortè is colore viridi, & austeritate quâdam Vitriolo haud ita dissimilis est. Ast istum Salem communem in verum Vitriolum non converti, sed à Vitriolo *larvam* quandam mutuasse, credibile est.

Si tamen urgeatur, Salia plurium generum, in eadem aqua simul *Tabescentia*, si coctione sicce-  
tur, seorsim singula propriis suis *Figuris*, & colo-  
re coire: Ita quidem est, fatemur. At si quis Sal  
Ferrum, cuprumve corroserit, (puta, Sal commu-  
nis, vi ignis in Spiritum attenuatus, aut aliàs) tum  
quidem illum in *alienam Figuram* posse, ex ali-  
qua parte *contaminari* existimamus.

At frustra fortè litigo; nam de Veritate expe-  
rimenti, *nondum edui*, nobis non constat.

## CAPUT VII.

*Vitriolum maturum in aquis nostris medi-  
catis raro, aut nunquam reperitur; at  
Pyritem in atramentosis ex tota Sub-  
stantia liquari.*

**V**itriolum autem *maturum* ab ullis aquis  
nostris medicatis, quod scio, elici non  
perhibetur. Id quod etiam jure mirantur  
Philosophi *Parisienses* post diligens examen cen-  
tum

*tum* ferè Fontium medicatorum *Gallie*. Idem ex parte in causa fuit, cur nostri homines tam inurbanas lites inter se moverunt. Cùm tamen in omni ferè agro nostro innumeri Fontes atramentosi sint, è quibus spontè Ocrea deijcitur; scilicet genuina Vitrioli fatura.

Adeoqve in animum inducere non possum, *Parad.* ut credam, Vitriolum Ferri in *Spadanis Fontibus Germanicis, Pohentio & Savenerio* dictis, ab *Helmanio* unquam offendi; quamvis, se seriò eorum aquas olim destillasse ait.

Hæc autem hujus rei summa est. Pyrites qvì in aere in merum Vitriolum proprià germinatione extoto convertitur; idem ipse lapis, sive metallū sub aqvīs in Spiritum, sive halitum Sulphureum, Ocreamve, quasi liquatur. Id est, *Ex tota natura* fit Spiritus, Unde non amplius miramur, tam tenuem succum (qvì etiam ipsissimus Pyrites est) in Crystallos concrescendi minus aptum esse.

Pyriten autem in aqvīs atramentosis ex tota substantià liquari, vaporareq; multa demonstrant.

1. In Thermis nostris quicquid (ut suprà positum est) earum halitui vaporoso obviam fit, Ocrea vehementer inficitur.

2. Item, tam de frigidis, quàm de calidis atramentosis illud notissimum est, eas, *Virichis* diligenter occlusis, tingendi cum gallis proprietatem diu servare, easdem verò, apertis vasculis servatas, multò citius tingere desinere: Scilicet ob Ocream.

eram non tam dejectam, quàm Vapidam, & à motu quiescentem.

Neque enim Plantarum alia *Narratio* est; cujus illustre exemplum de *Ligno Cedrino Bermudensi* olim \* dedimus; scilicet id apud me multos annos, nec jam desinere, *Resinam* suam totâ substantiâ vaporare.

3. *Ipsa Ocre* vaporat, ut suprà positum est, quod tamen à natura lapidea ex *ratione Chymica*, Scilicet corpore denso & gravi, maximè alienum est. Adeoque frustra expectari spiritum stillatitium, nimirum fermentationis alicujus opus: At hic noster, qui avolat spiritus, ipsum metallum vegetans est,

4. Saporem, odoremq; istiusmodi aquarum sub prima earum distillatione ex toto perdi, citra alicujus Spiritus dicti separationem, vel maxima diligentia adhibita; atque simul omnino facultatem tingendi cum gallis.

5. Imò ipsa tingendi proprietas per se tandem moritur, etiamsi aqua, vel diligentissimè obturatis vitreis vasculis, servetur; atque adeo non ratione alicujus vaporis amissi, sed motus ejus vegetantis languidi, & planè quiescentis, mortuique.

6. *Ocre* & lapidis *Calcarii* vel ipsa *dejectio*, ea in *succo* fuisse, indicat. Nam à suis *salibus* (qui aut nulli, aut admodum exigui sunt, ut suprà positum est) ne *subsistant*, vel momento temporis, non posse *prohiberi*. Attamen, contra naturam densorum

& Gra

*Philoso.*  
*Trans. Num*  
110.

& Gravium corporum, (ut illa quidem sunt) ipsa Ocre lente quidem, maxime si, vel clausis vasculis, diligenter aqua servetur, aut si sibi, non adhibito calore ullo, permittatur; & lapis calcarius egrè tandem, & non nisi à longo & vehementi gelu, dejicitur.

7. In quibus Fontibus Ocre & lapis calcarius maxime abundant, ibi minimum Salis reperitur; scilicet in aquis atramentosis, ubi plurimum Ocre, ibi omnino nihil Vitrioli. Item in Fonte lapidescente, (forte in Anglia insigniori) juxta *Knazeborough* Sal se habet ad lapideam farinam, ut r. ad 20. Contra autem in ipso Vitriolo maturo & nitro calcario Ocre & lapis calcarius in multò minimà portione sunt ad salina principia, Vide licet VI. Unciæ Nitri calcarij ad duas uncias subito cremantur; Et similiter de *Colcothare* Vitrioli puta.

8. Pyriten ex toto sub specie succi aquis atramentosis inesse, hoc experimento constat. Aquæ alicui atramentosæ, ubi scilicet plurimum Ocre habetur, puta *Maltonensi*, jam jam à Fonte haustæ, illius Lixivij tantillum guttatim adjice, quod Saponarij conficiunt ex calce viva & cineribus *clavellatis* dictis; & ipsum Pyriten ( adeo quod subsidet, aureo splendore micat ) dejici credas licet.

9. Alia pyritæ ratio in aere, de qua supra egimus, atq; alia ejusdem, sub aquis perpetuò immersi; Si quidem in aere Vitriolum è pyrite nascitur;

scitur;

scitur; sub aquis verò Pyrites *quasi liquatur*. Hæc autem huic rei fidem faciunt, nimirum ipsum Pyriten in solam Ocræ & Sulphur posse cremari: Ab eoqve Vitriolum vi ignis minimè elici posse: Similiter in aquis atramentosis Ocræ halitusqve Suphureus semper adest; minimè quidem Vitriolum, certè maturum.

At ipsum Vitriolum (cujus alia nativitas supra declarata est) in tria principia resolvitur; quorum scilicet unum Salinum, alterum Sulphur, & tertium Ocræ est. Salinum verò ejus principium solæ germinationi Pyritæ in aere debetur.

De Sulphure autem in Vitriolo *severiores* aliqui dubitant: At quid sit de Sulphure Pyritæ, quem ignis tormento ad magnam sui partem in Sulphur propelli posse diximus. Atqve idem in aere tandem ex toto fit Vitriolum. Deinde alii modi apud Recentiores quosdam describuntur, quibus ipsum Sulphur ex oleo Vitrioli elicitur, quos, brevitatis memor, omitto. At non nego, quin *aliqui* Fontes ita comparati esse possint, vel loci, id est, subterranei alicujus ductus ratione, *ut semper*; vel etiam *Universi atramentosi*, ob admodum incertum aquæ incrementum, *ut certe aliquando* Vitriolum in hoc, vel in illo maturitatis statu (quem triplicem esse supra demonstravimus) exhibeant. Si quid itaqve de hac re certum explorare aliquis *curiosus* velit, an, & quomodo in Fontibus atramentosis Vitriolum detur. Næ, is multa & longa diligentia utetur, necesse est, &

Præcipuè in omni notabiliter mutata cæli tempestate sæpius ad examen revocandi sunt.

At dicet aliquis, Vitriolum *coire* cum sale calcario; hæc mera suspicio est, ut opinor: Si tamen Vitriolum aliquod crudum subsit (nam de maturo verum esse non potest, siquidem à colore & Figura ubi subsit, facile discernitur) felix erit qui id vinculum ita dissolvere possit; ut ambo salia per se exhibeantur, & in conspectum veniant.

Deinde haud credibile est, Sal calcarium magis sub se continere Vitriolum, quàm sal commune, ubi tamen Pyritæ odor vehemens est; Ut in Fontibus nonnullis falsis, ubi tamen *ne gry* quidem Vitrioli. At de his alij, quibus otium est, videant: nihil equidem affirmo.

## CAPUT VIII.

*Fontium quorundam Petrificationis ratio.*

**P**etrificationis autem rationem paucis sic intelligo. Pyrites & lapis calcarius (neque enim alia metalla quantum observavi, lapidescunt) tota substantia, uti proximè superiore capite edictum est, in istiusmodi Fontibus *Subili* ad modum *anræ* quasi *liquantur*; Unde quodvis crassum lignum facile penetrant; & *lignei* quidem *Pyritæ* ex maximè interna parte lapidescunt: Id quod de pulvere aliquo calcario, aut Ocre, ut ut subtilissima, vix concipi potest.

Deinde ex istis ligneis Pyritis Vitriolum in aere gignitur; ergo ex tota substantia Pyritarum sunt.

Contra

Contra *Precipitationem* autem aliquam, aut *salis divorcium*, in petrificatione multa faciunt.

1. Nimirum istiusmodi Fontes ferè non *turbari*, aut lutulentos fieri.

2. Ocrum & lapidem calcarium per se quidem *dejici*, at citra ullam tamen *concretionem*, &c.

## C A P: IX.

*Thermarum ratio*, è salibus *Pyrite* & *lapidis Calcarij* nascentibus, *sive* *ipsis pyritis* & *lapide calcario* vegetantibus *deducitur*; *aliæque sententiæ refutantur*.

**A** Quas nostras *calidas Bathonienses* atramentosas esse, & Salia duorum generum in se continere, nimirum Sal commune nitrumque calcarium: Item Ocrum & lapidem calcarium exhibere, supra expositum est: quo verò modo *incalescant*, multum dubij habet.

Ipse autem sic sentio, *Thermas* nostras à *Pyrite* & *lapide Calcario Vegetantibus* calorem suum mutuae.

Sal vulgare excludo, quod fere solâ liqvatione nasci videtur.

Ab utroque autem metallo *vegetante halitus calidus* oritur: *Pyritæ* quidem is maxime *Sulphureus*



phureus, vehemens & inflammabilis; lapidis autem calcarii mitior, leviorque est; quod sic probetur. De Pyrite autem incipiam.

I. Ubi Saxa *Puteis*, *Cuniculisve* aperiuntur, ibi quidem vapor subtilis, & qui facillimè, Sulphuris, instat, accendi potest, metallariis quæ adeo summè perniciosus, ferè oritur.

Deinde *veinstioribus* Metallorum fodinis maxime infellusite vapor; quod ibi longum Spiritui Sulphureo generandi spatium fuit.

Item illud universo consensu testantur Metallarii *puteos* subterraneos totâ hyeme, *geluq;* præcipuè tempore, admodum tepidos esse.

Pyriten autem copiosissimè Sulphur edere, supra probatum est; & ulterius affirmo, in nullo omnino metallo *terre Angliæ* Sulphur inesse, nisi quatenus pyrites est, Pyritæve mixtum aut porticipans; non plumbum, non carbonem fossilem, non aluminis metallum, & sic de cæteris quibuslibet metallis similiter affirmo: Idque non audacter, aut temerè dictum quis credat, nam multâ experientiâ id tandem didici.

Ut autem scias, quid & quatenus aliquid metallum Pyritæ particeps est, Magnetem adhibe, metallo debite prius contrito, crematoque, & experimento nunquam frustraberis.

Pyritæ autem halitus effectus sunt *Fulmina & Fulgura*, si in cælo accendatur; \* *Tertia motus*, si for-

*Fulmina & Fulgura* in quibusdam *minis, Sulphuris* odorem habent.

tè cavis subterraneis accensus  
contineatur *Therma* si per aqua-  
rum ductus sub terraneos copi-  
osè feratur, etiamsi non ac-  
cendatur.

ac lux ipsa eorum  
*Sulphurea* est *Plin.*  
ib. 35 c. 15.

§. 2. *Halitum* quoque calidum à lapide cal-  
cario *Vegetante*, similiter ferri, sic probo.

Universos ferè *Fontes*, *Puteosque* (nam plerique,  
eatenus medicati existimati sunt, quatenus hoc  
vel illo sale copiosius imbuuntur) præcipuè vehe-  
mentioris gelu tempore tepidos esse, atque ad-  
modum copiosè etiam conspicuos densissimo  
vapore humido, *Thermarum* instar, *halitus* emit-  
tere.

De veritate hujus experimenti, scilicet aliquot  
puteos aquarum in Urbe *Roma* gelu tempore  
extra dubium tepidos fuisse, vide, & consule  
testimonium. *D. I. Ray* \* nostri, viri, si quis alius,  
rerum naturalium peritissimè.

\* *Itinera-*  
*rio.*

*Anglicè*  
*scriptio.*

Calorem autem aliquot *Fontium* præter ex-  
perimentum sensus, hæc indicant, scilicet plan-  
tarum circumnascentium & innatantium perpe-  
tua viriditas.

Item istorum *Fontium* aquam non faciliè con-  
gelari, vel vehementissimâ tempestate.

Istum autem *Fontium* teporem, adeo sensibus  
manifestum, à loci, aut ipsius *aquæ* (quæ una ubi-  
que est) proprietate, oriri minimè existimandum est  
Sed ab halitu quodam calido, in ipsis aquarum  
ductibus subterraneis nato.

At præter Pyriten & lapidem Calcarium nihil, quod scio, halituosum emittit vaporem: atque adeo vel ambobus, vel eorum altero iste halitus *calefactionis* attribuendus est.

Jam verò Pyrites metallum rarius est; si cum lapide calcario comparetur; qui ubique ferè ingenti quantitate & *continua caute* reperitur, ut supra posuimus.

Deinde Pyritæ halitus ferè ab Ocrâ vaporante dignoscitur: igitur restat, ut iste Fontium tepor plerumque à lapide calcario oriatur.

A vaporibus calidis Thermas incallescere, hæc quoque faciunt à Philosophis *Parisiensibus* exposita.

1. Quod in os sumptæ, haud æquè id adurunt, ac aqua communis, ad eundem caloris gradum igne culinari calefacta: Id quod à materiæ tenuitate, à qua Thermæ incallescunt, oriri videtur; Siquidem Spiritus Vini dicti flamma manum haud æquè adurit, ac pruna, ei imposita.

2. Ex *coctura* ratione: sunt enim folia quædam, quæ colore tantum mutat mutato, in calidissimis Galliæ Thermis rigida permanent; cum eadem à levi coctura aquæ ferventis mollia fiunt, unde conjiciunt, Thermarum illum calorem desiccativum esse potius, quàm humectantem.

3. Quod Thermæ noctu plus incallescunt, quàm interdiu; scilicet ab aere nocturno vapores calidi nimium dissipantur.

4. Quod Thermarum aqua, aeri exposita, calorem suum diutius retinet, quàm aqua communis, ad ignem

ignem calefacta, quòd motum, ab igne excitatum, aer frigidus subito cessare facit. Thermarum vero calidos vapores idem aer frigidus prohibet, ne tam citò dissipentur.

§. Quòd Thermarum aqua, in ignem imposita; idem temporis spatium ad effervescendum requireret, ac ipsa aqua communis frigida, unde liquet, Thermas ab igne aliquo subterraneo non calefactas fuisse. *Hac autem illi.*

His addo, ut Pyritæ & lapidis Calcarii vegetationem halituosam esse probem: nimirum in udis & humidis, algidisque locis Salium eorum vegetationem maximè promoveri.

Rursus, à Tonitru ferè *Vehementes pluvias* accidere; quòd vix fieri credibile est, si per se, & *Siccus* emitteretur Pyritæ *halitus*.

Cùm autem id vapore aliquo humido per minima miscetur, si quando, quacunque de causa, incendi contingat, aqueas particulas simul cogi, deijiciq; necesse est; scilicet *Spiritu*, cujus solius motu & agitatione in auras feruntur, *exploso*.

Haftenus *nostra* opinio explicata est; jam ad *aliorum* de Thermis *Opiniones* refutandas transeo.

1. Alii autem Thermarum calorem à *facili Metallorum* quorundam. (Pyritæ puta) *accensione* oriri existimant.

*Multa sunt mineralia, (inquit Paracelsus) quæ ab aere incenduntur, adeoque aquas in suis regionibus contentas calefaciunt. Id quidem ex parte verum esse potest; at apud nos, id est, in An-*

\* De  
Thermis  
cap. 3.  
Jourdan.  
de Balis.

glia

*glie* Vicinia, nulli naturaliter *Vulcani* sunt: Neque enim opus esse arbitror, ut vapor, sive spiritus iste, Pyritæ reipsâ accendatur, ut aquæ calidæ fiant: Si quidem illum alterum spiritum è lapide calcario, fortè ex sua natura *omnino non inflammabilem* (nam aliam naturam, si fortè in *Halonitrum* mutetur, induit) tamen Fontium aquis teporem notabilem impertire, suprà demonstravimus.

2. *Corrosionem* verò inter salem, nescio quæm, Esurinum & Ferri metallum suprà refutavimus. At detur & vel valentissimus Nitri spiritus, ex aquâ dilutus, in quemvis pulverem aut lapidis alicujus, calcarii puta, aut corallii, injiciatur, etsi magnum quidem tumultum, calorem tamen non movebit.

3. \* Alii *Lustam*, inter diversos sales excitam sive *conjunctiones contrarias*, caloris causam perhibent.

\* *Paracelsus*  
*De baln.*  
*na. T. I.*

Respondeo, ipsi sales inter se naturaliter non discordant, sed tranquillè in eadem aqua permiscentur. Si tamen unquam in conjunctione ferveant, id non antè evenire solet, quàm ignem chimica aliquæ præparatione experti sunt.

Sic oleum Vitrioli dictum, cum aqua simplici commistum, eam statim fervidam facit, non ob aliquam salium contrarietatem, (quæ nulla sunt) sed quòd ex distillatione vehementi igneam naturam, calcis vivæ more, retinet. Idem de cæteris Salibus cogita.

4. Quòd autem non sit aquæ alicujus proprietas,

ex

ex isto Fonte, five puteo, vel tepente, vel calido, aqua hauriatur; & mox ea perse *Frigescit*, & *conglaciatur*, halitusq; mitti desinunt?

## CAPUT X.

### *De Pluviarum Ortu & Materia.*

**S**uperiore Capite ipsius Pyritæ Vaporem humidum esse diximus, cum autem universos Fontes à sola pluvia oriri, credibile sit, idq; a Wittio \* nostro, doctè quidem, aliisque fusc ptobatum sit; cumq; Pluviarum Ortum vapori isti humido, tum Pyritarum, tum lapidis Calcarii, magna ex parte referendum esse existimem; De *Pluviarum Ortu & Materia* hic paucis disserere, ab instituto nostro non alienum erit.

1. A *Catere Solis aque exhalant*, unde pluviis materia multa, at non sola.

2. Huc accedit universorum *animalium halitus*, etiam *Insectorum*; quod sensibus liqvidò pate fit si sub Vitreis vasculis aliquantisper serventur.

3. Item *Plantarum Spiritus*: quòd autem *Plantarum Vita halituosa* sit, perinde ut animalium experimento, admodum feliciter excogitato, demonstravit *Willsius* \* quidem *Oxonsensis*.

Idem quoque multis retrò seculis A Plinio pròditum est de herba *Æthiopide*, quod tamen *Phenomenon* ipse inter magicas vanitates posuit.

*Æthiope*

\* *Dd*  
*Fonte*  
*Scarbor-*  
*genst.*

\* *Historia*  
*Æ. Agri*  
*Oxon.*  
*D. Ploeti*

*Æthiope herba* \* (inquit ille) *ex aliis, amnes & stagna* Lib. 26.  
*siccari conjeclu* : In derisionem verò rei infra ad- Cap. 4.  
 dit, *Siccentur hodie Æthiopide Pontinæ paludes,*  
*tantumque agri suburbanæ reddatur Italia.* Verùm  
 enim verò, si quis diligenter attendat ipsius her-  
 bæ descriptionem, quam paulò infra tradit his  
 verbis, (*Æthiopis* \* *Folia habet magna & multa,* Lib. 27.  
*radices numerosas, plenas*) atque illam cum experi- Cap. 24.  
 mento suprà citato, conferat, non amplius, ut  
 opinor, de rei veritate dubitare licebit.

Imo Fontibus, Fluviis, stagnisque, quæ in-  
 nascuntur herbæ, quantam aquæ portionem  
 quotidie hauriant, vix credibile est.

Huc accedit Sylvarum, herbarumque in sicco  
 nascentium eadem ratione impensum mirandum  
 \* Nascuntur Fontes, (inquit idem Plinius) de-  
 cisis plerumque sylvis, quos arborum alimenta  
 consumeant.

Item ipse ros nocturnus è plantarum spiritu  
 densato maxime oritur; quòd is Majo mense ap-  
 pud nos longe copiosissimus sit, nimirum cum  
 plantæ vegetiores sunt, & maxime increscunt;  
 aliis verò mensibus multò minor est, hyeme ex-  
 iguus ros.

Idem experimentum de *Alga* in aqua marina  
 aliquoties feci, atque ita *aquam dulcem & potabi-*  
*lem* elicere potui, *novo distillandi modo*, Nautis  
 quidem optatissimo & utilissimo fortè futuro  
 quod sine invidia communico.

4. At fortè longè maxima pluviarum materia à solibus Metallorum subterraneis, & præcipuè Pyritæ & lapidis *Calcarii*, vegetantibus oritur, scilicet à quibus Fontium, Fluminum, Paludumque aqua, imò ipsum Mare in nebulas copiosè exiuntur: id quod de Fontibus suprâ demonstratum est, idem de reliquis, quibuscunque, aquis cogita.

In regione aliqua montosa Vesperî in vallibus, æstate & hyeme, maximè rigente gelu, densæ quædam nebula à Fluviis & stagnis assiduè oriuntur: summo autem mane eadem medio circiter itinere montes ascendisse conspiciuntur: Sole verò orto, vel aliquo vento, aut dissipantur, aut si eodem die ad montium cacumina eas pervenire contingat, ferè perpetuo in pluviam condensatæ iterum in vâles cadunt. Quòd autem id Phænomenon æstate Vesperî & hyeme, maxime gelu tempore, in conspectum veniat, utriusque eadem ratio est; nimirum à purgatissimo aere, in quem novus vapor recipitur, id fit.

Nam gelu aer solito tenuior est, scilicet ob universas aqueas particulas, in pruina ab ipso ortu assiduè conversas. Similiter æstate, maximè Vesperî, Fluviorum, puta, vapor conspicuus fit; quòd ab æstu idem aer interdium purgatus sit, vapore in altum assiduè raptò.

C A P. II.

*Fontium, ex Sulphure foetentium, ratio.*

AN



**A**Naqua alicujus *Fontis* ex sua natura, vel contentorum ratione, *foetet*, vix ulla dubitandi causa est. Fontibus autem medicatis, ex *Sulphure foetentibus*, unum, ut supra positum est, *Sal*, idque vulgare, inest. Est autem præterea vapor, sive halitus *Sulphureus*, à *Pyrite* natus. Is autem ex bona parte *Præcipitari* videtur ipsa nativitate; atque ita odor ille putidus illius *dejectionis* effectus est.

*Dejectionis* autem hæc *indicia* sunt.

1. *Flos* quidam *albicans*, universis hujusmodi aquis *innatans*, & circa oras istiusmodi *Fontium* ubique adhærens. Iste autem flos *merum Sulphur* est, Huc accedit, eas *Argentum tingere* primum subflavo, mox *Nigricante* colore, utpote ejusdem *Sulphuris* effectus.

2. Deinde *Lutum Nigerrimum*; id quoque *Sulphureum* est.

3. *Festucas* & lapides in istis *Fontibus* *expurpure* tingi.

4. Item aqua horum *Fontium* *Subturbida* est, certè si cum aliis comparetur.

5. *Universæ acidulæ*, certè atramentosæ, quas eatenus ex *pyrite* oriri, supra demonstravimus, si paulò diutius *Utriculis* ferventur, ipsum eundem *Sulphureum* odorem cum famosissimis illis in *Vicinia Knaresborough* spirant.

6. Parùm cocta & foetidum odorem, & argen-  
tum

tum tingendi proprietatem amittit, halitu scilicet Sulphureo igne exacto, mortuoque.

Dejectionis autem causa certè ex aliqua parte esse potest ipsius Aquæ ductus *fracedo*, scilicet ex aqua ibi primum stagnante, ex aliquo accidente: Et reverà universi hi Fontes vel stagnare vel pigerrimi esse perhibentur.

Quid ni numeremus in hoc censu, ipsius *salis* vulgaris copia?

## CAP. 12.

*Varia quæ Fontes Medicati Angliæ à nostris Scriptoribus comprehendere dicuntur, breviter examinantur.*

**F**ontes medicati *Anglia* alia atq; alia continere ab aliis Scriptoribus nostris, qui pauci non sunt, enumerantur. Tantæ autem *diversitatis ratio* esse Videtur, Universos *unum Veriolum* quæritasse, sed frustra. Singula autem, ab aliis recensita, jam paucis excutiam.

Imprimis verò *Nitrum* nescio quo fato, ferè plerisque nostris hominibus placuit.

At *Nitrum*, recentiorum *Salpetra*, & *Halontum* dictum, tantum non *factitium* est. Illud quidem verum est, id vix alibi uspiam repertum esse, quam ubi multum animalia frequentarunt, adeo

adeo id *imis* terræ visceribus & *sub* ipsis *montibus* nasci, per quos plurimi medicati Fontes discunt, cogitare durum est.

Fortè arte quàm *Salpetra* confici possit; cum tamen lapis nitrosos naturaliter nullus sit, ut ex duobus alterum, scilicet vel *Pyrites*, vel lapis calcarius, Nitro materiam præbeat, necesse est.

An fortè isti lapides urina macerandi, vel aliàs præparandi sint, antequam germinent, Posteris excogitare, & rem conficere relinquo.

At quamvis ulli *lapides naturaliter nitrosi* sunt; tamen est quædam *gleba* ejus *salis fertilis*, & quæ semel eo sale fecundatur, ejus germen diutius retinet. Nimirum eadem *nitrosa Gleba*, sale suo coctione exhausta, si in loco à ventorum & pluviz injuriis libero asservetur, iterum novo nitro pullulare dicitur: At venti & Pluviz immaturum, saltem tantum dissipant; fertilitatis verò causa in ipsa *Gleba* est.

At aliquam multi affirmant, quorundam Fontium Salia in *stirias* concrescere solere. Læve quidem Nitri indicium! Etiam ipsum Vitrioli oleum dictum, Brumæ tempore in *stirias* concretum, habui, & sic apud me diu servavi. Idem *Coxius* \* *Philosophi noster* perhibet. \* idem de Sale quoque marino in *stirias* concreto, suprâ notavi. At hæc potius ex quadam evaporationis aut concretionis ratione, quàm ex salis natura oriuntur. At detur Sal quorundam Fontium in nescio, quas informes *stirias* ex aliqua parte naturaliter coire. Tamen

aliæ

*Philosophi noster*  
*Transact*  
*D. Olden*  
*N. 103.*

aliæ insigniores *Nitri Proprietates* ex ipsis iisdem autoribus defunt; nimirum, in tenuem *flammam coloratam*, subito & non sine quodam tonitru & fulgore accendi posse: esse *sexangulas* ejus Chrystallos, &c.

De *Nitro* verò *Antiquorum* ejus sententiæ sum, id fortè in *Europa*, certè in his nostris regionibus Borealibus naturaliter nusquam reperiri; siquidem ex *Antiquorum* descriptione, relationèqve, si attendas, istiusmodi Sal terræ *Africae* aut *Asiae* genus proprium. & ex toto genere à nostro factitio distinctum esse videbitur.

Alii *Sal marinum* quibusdam Fontibus nostris inesse velint; quibus tamen non inest.

In aliis tamen multis, præter falsos malè olentes, id etiam atramentosis in esse, nihil dubito. Velim tamen *salem crudum* Vitrioli cubico-rhomboidem diligentius attendant, si quando aliquibus Fontium nostrorum examinadoribus reperiri contingat.

Alii sunt, qui in aliquibus nostris aquis atramentosis pro *Alumine* acriter contendunt; hi Chimiæ quoque adpellant; at metallorum minus periti sunt. Deinde Falsi sunt, cum certum est, eos è cumulo ustulatae rupis aluminosæ illos lapides sumpsisse, de quibus experimentum fecerunt. Qui etiam, cum leviter tantum cremati sint, tamen vel à fumo contaminati, vel satis temporis ad Vitriolum suum edendum in aere expositi sunt: Illudque verissimum esse censeo, Univer-

sam

ſa rupem, quatenus aluminofam, *noviſſimè exciſam* crudamq̃, aqvam, in qva macerata fuit, atramentofam cum gallis omnino non reddere. Id quod rectè *Wittius noſter* atteſtatus eſt; & ego diligenter expertus ſum. Lixivium autem uſſulati lapidis aluminofi, aut etiam crudi, ſatis diù in aere expoſiti, eatenus atramentofum fit, quatenus Pyritæ participavit.

Pyriten autem cum Aluminis metallo ubiqve eſſe commiſtum, multa demonſtrant. Scilicet in Summo lapidis cremati cumulo, tere Sulphuris copia, quæ ſcilicet Pyritæ genuina proles eſt, reperitur. At ipſe quoq̃ *Pyritæ* ex aureo ſuo ſplendore ibidem in conſpectum venit. Et à diligenti examinatore, certè Magnete rectè adhibito, ſere ubiqve in ipſo metallo aluminofſo deprehenditur. Ipſe etiam illud teſtor, me Glebam Alumine diſſimam puram putam ex Hibernia habere, quam curioſè adhuc apud me ſervo: Alumen verò ex hoc metallo, non aliter, quàm Vitriolum è Pyrite, aſſiduè effloreſcit.

Cum verò poſt germinationem plurium menſium hoſce *pilos aluminofos* excuterem, eam cum gallis aqvam, in qva ſoluti fuerunt, minimè atramentofam redderent. Porro hi *Pili* aluminofi, etiam ex *anno* incremento ſemper *albi* manebant; cum tamen Pyritæ, ſive Vitriolici pili, etiam proximè a nativitate *Virideſcunt*. Item illos fuiſſe ipſum Alumen, vel ex guſtu eorum ſubdulci, & maxime aſtero, cuilibet diſcernere facile eſt.

est: De ipsius autem aluminis & Vitrioli Crystal-  
lis, ut differant, supra expositum est. Attamen  
Aluminis metalla sincera, & omni Pyrite vacua,  
certè apud nos, quod scio, rarissimè reperiuntur.  
His adde, ipsum Alumen alvum vehementer  
comprimere; At acidulæ nostræ atramentosæ,  
quibus id maxime inesse dicitur, ventrem solvere, ut  
sunt aquæ Fontis Scarborgensis; & ex Sulphure  
foetentes juxta *Harrigate*.

Alii rursus ipsam Ocram Fontis Scarborgensis,  
(ne quid Omittam, quod ab aliis minus verifi-  
mile dictum sit) esse terram aluminosam, sive  
aluminis metallum, affirmant. At hi fortè Ma-  
gnetis experimento vix fidem habent; quod ta-  
men verissimum est. Nam illa ipsa Ocra, quæ  
pauca levior *Bal. Mar.* dict. calore dejicitur, si de-  
bite ustuletur, & libenter Magneti obsequi, & si  
diutius loco humido servetur, ubi germinet, eti-  
am Vitriolum Ferri viride edet: Hæc autem,  
propria experientia edoctus, ipse testor.

At ulterius objicitur, hujus proxime nominati,  
aliorumque quorundam Fontium aquarum  
etiam atramentosarum, ut Thermarum Bathoni-  
ensium, contenta, etiamsi diutius calcinentur,  
albescere; Respondeo.

Ocram ferè in Thermis, alibi que in frigidis  
medicatis a volare solere, & quasi spiritus sui cer-  
te generis quandam rationem subire, ut supra  
expositum est.

Item si lenis si coctio, ex parte quidem  
deficitur; ut etiam spontè per se, aut cum

galla cadit. Ita ut id in aquis quibusdam atramentosis contineri, nihil dubii sit. Item in aliis, ubi abundat, ut in *Maltonensibus*, etiam contenta calcinata, ut ipsa Ocre cremata, admodum, rubescunt. Adeoque ex *paucitate Ocre albescent*; unde non sequitur, ipsam Ocream in istis aquis ideo non fuisse; ubi illam extare multis aliis argumentis demonstratur. Deinde, etiamsi omnino nihil e contentis crematis Magnes attrahat; tamen nihil ominus Ferri metallum ibi esse posse, credibile est.

Nam ex ipso *Chalybe, Viriolum confectum*, etiam non leviter ustulatum, Magnes non attrahit, Ut ipse expertus sum. Adeo à reliquis partibus inter se commixtis, maximèque salinis, admodum diligenter purgetur, necesse est, ut experimentum Magnetis ritè succedat.

De *Bitumine* autem in Thermis nostris Bathoniensibus, *Majo, Junio. & Julio* præcipuè colligendo, nihil habeo, quod affirmem: Cum nondum mihi certò constat, id bitumen esse; nam à duobus viris probis, ejus *urbis* indigenis, illius bituminis dicti haud modicam quantitatem transmissam habui. At id totum ex corporum strigmentis fuisse affirmo, & aliud præterea nihil adde, quod iis tantum mensibus colligi perhibetur, cum Thermæ maximè frequentantur.

*Aliquid*

*Aliquid autem vel in hac, vel in alie-  
ra Exercitatione, de utilitate & effecti-  
bus Fontium medicatorum Anglia in cor-  
pora humana dicendum putavi, & medi-  
tor. At ea impraesentiarum ferè manca sunt  
& paucæ; nec aliquid, nisi propria expe-  
rientia doctum, libenter exhiberem. Vere-  
or autem, ne mihi restet vita, ad ea ex  
animo finienda; aut si id, tamen ex  
assiduus & importunis negotiis nostris vix  
otium dabitur.*

**F I N I S.**

